

In'aventura fitg interessanta

Alvra/surses: Curs da lavgnas

■ (cp) Dapi emnas ma legrav'jau sin quest di. Venderdi passà, il davos di avant las vacanzas, èsi finalmain stà uschè lunsch. Nossa scola è ida a Savognin per realisar il project da lavinas. Jau era gia daditg pronta per vacanzas. Jau hai stuì vegnir a scola sco tut ils dis, ma quest di hai jau pudì laschar mes cudeschs a chasa. Persuenter hai jau prendì mes equipament d'ir cun skis cun mai. Arrivada a scola èn tut ils scolars entrads en il bus en direcziun Savognin. Cura che nus essan arrivads a Savognin, essan nus tuts ids en la Sala Grava nua che nus avain udì ina preschentaziun sur da lavinas e la prevenziun. Suenter han ils manaders fatg gruppas.

Scolars da Savognin e da Casti

En mintga gruppa avevi scolars da Casti e scolars da Savognin. Silsuenter essan nus ids en il territori da skis. Nus essan ids in mument cun skis ed avain giudi la bell'aura e las bunas relaziuns da naiv. Cura che nus avain fermà ha il manader declerà a nus il profil da naiv. El ha declerà che las variaziuns da temperaturas e la radiaziun dal sulegl pon midar la consistenza da la naiv. Sch'i dat naiv la fin da l'emna lura d'vri in temp avant che la naiv nova targa sin la naiv veglia.

Tar la proxima fermada ha noss manader declerà a nus il bulletin da lavinas. Uss enconuschain nus ils differents privels. Nus enconuschevan teoreticamain tut quels privels avant, ma enfin ussa n'avain nus anc betg propi fatg quità sur da quai. Davent dad us-



Divers scolars sin in post per tschertgar insatgi sut la neiv.

sa na vom jau betg ord la pista sch'il privel è grond u fitg grond. Jau sai ussa ch'igl è malsegir dad ir cun skis en

la naiv frestga sin la vart dal nord nua ch'i n'ha mai sulegl. Jau sai era che pendenzas ch'èn daplì che 35 grads èn

las pli privlusas. Jau hai survegnì tips pratics per mesirar l'inclinaziun. Jau hai er emprendì che crests, couloirs e

foppas èn pli privlusas che fils da muntognas.

Lavruar cun barivox e chaun da lavinas

E puspè essan nus ids in pèr giadas cun skis avant che far la proxima pausa. Questa giada avain nus emprendì insatge sur dal barivox. Nus avain dastgà empruvar ora quest guaffen. Cun il barivox pon ins tschertgar persunas che èn vegnidas en ina lavina. Ins na dastga betg emblidar da metter si el. Il manader ha ditg ch'il pli impurtant saja da dar in clom d'agid e da marcar il lieu nua che las persunas savessan esser. Uschia sa la colonna d'agid sondar e chavar ora las persunas.

Esser en la colonna d'agid è schon ina gronda responsabladad. Jau sun stada fitg cuntenta cura che nus avain savi far ina pausa da mezdi per mangiar e per survegnir chaud. Jau hai giudi mes pommes cun chicken nuggets e mia cola light. Nus avain pudì discutir tut ils scenaris pussaivels ed era pudì prender d'enconuscher ils scolars da Savognin.

A las duas èn tut las gruppas vegnidas ensemen. La colonna d'agid aveva preparà ina demonstraziun cun ils chauns da lavinas. Els han mussà co ch'ils chauns pon sentir tras la naiv e co ch'els gidan uschia da spendrar vitas. Els avevan dus chauns. In era in vegl e fitg bain dressà cun blera experientscha. L'auter era anc giuven e n'aveva betg anc blera experientscha. Igl è stà fitg impressiunant da guardar quai. Forsa sun jau er in di en la colonna d'agid.

Divers plazs da podest per indigenas

Cursa populara son Caschang

DA GION NUTEGN STGIER / ANR

■ Bunas prestaziuns dallas participantas e digls participants da nossa regiun tar la 43avla ediziun dalla cursa populara da passlung son Caschang. Igl migler taimp digl de ò gia Dominik Meier da Clostra ed igl pi spert Surmiran è sto Livio Corsini da Lai. Dasperas la cursa da passlung «Planoiras» totga chella da son Caschang tar ena occurrenza tgi sveglia gio siva da 43 onns igl interess da sportists da gliunsch e da manivel. Cun ena participaziun da passa 250 participantas e participants è igl domber dalla cursa da dumengia passada ple u manc sto aint igl rom digls davos onns.

Malgro las temperaturas pi otas sa preschentava la loipa, ainten ed anturn l'arena da biatlon a Lantsch, an ena buna cundiziun. Tiers la neiv loma on tots gia relaziuns optimalas tar la cursa cun ena distanza da 20 km per igls omens e 10 km tar las donnas. Sainza en bung ski è igl tratg alloura bagn sto pretensious, uscheia tgi l'egn u l'oter ò pitia durant la cursa e chegl tar igl omens scu tar las donnas.

Livio Corsini è nia terz e Sascha Janutin 5avel

La categoria principala 20 km stil liber ò gudagnea Dominik Meier da Clostra, el tgi è savens davant tar las cursas popularas da passlung. Per igls 20 km ò igl


sportist da 22 onns gia ensatge duple tgi 43 minutas. Nia ègl alla fegn dalla cursa tar ena veira finalissima tranter el e Till Wiestner, igl biatlet da Trin tgi ò miand pers ena secunda segl victour. 12 secundas pi dei tgi igls dus pi sperts ò alloura gia Luzi Corsini, igl indigen da Lai tgi è sa musso ventirevel digl sies terz plaz tar la cursa da son Caschang 2016. Ena bunga cursa è reuscheida a Sascha Janutin da Savognin, el tgi para dad esser bagn an furma cun contanscher igl 5avel post ainten la categoria principala. Segl victour Dominik Meier perda el pero stgers treis minutas. Da nossa regiun è gartagea a nigns oters passlungists da sa classar ainten igls top diesch.

Claudio Trinkler ed Arno Baselgia segl podest

La categoria omens II, sur 40 onns, ò Sascha Deplazes da Sedrun decidia a sia favour. El è sto per 8.5 secundas pi spert tgi Claudio Trinkler da Mon e per ena minuta e diesch secundas avant all'arrivada tgi igl matadour local Arno Baselgia da Lantsch. Igl indigen è nia terz e cun chel resultat sto eneda duple segl podest tar ena cursa da passlung populara. El, Claudio Trinkler scu er Luzi Corsini paran dad esser prongs pigl maraton engiadines tgi ò li an diesch deis. Er ainten la categoria II digls omens è betg gartagea ad ulteriours participants da Surmeir da contanscher en plaz ainten igls top diesch.

Dus donnas indigenas on fatg ena medaglia

Remarcabla alloura la prestaziun da Tanja Willi da Lantsch tgi è neida terza tar las donnas I sur la distanza da 10 km. Gudagnea ò cò Selina Wyler da Tavov. Schizont sagonda tar las donnas sur 40 onns è neida Manuela Baselgia da Lantsch. Ella perda sen la victoura Gabby Landolt da Glaruna ensatge duple tgi ena minuta. La victoura sa catta damai betg angal bagn segl bike, mabagn er sen igls skis da cursa lunga. Tar las cursas da bike popularas è Gabby Landolt adegna puspe segl podest, cunzont tar cursas da bike da muntogna.



Igls treis amprens dalla categoria principala: Till Wiestner, Dominik Meier e Luzi Corsini (da san.).



Ainten la categoria digls omens II èn els treis stos igls miglers: Claudio Trinkler, Sascha Deplazes ed Arno Baselgia (da san.).

FOTOS G. N. STGIER